


ՎԵՆԱՐԱՆՈՒՄ



ՄՏԱՎՈՐԱԿԱՆՆԵՐԻ ՀԱՆԴԻՊՈՒՄ ՎԵՆԱՐԱՆՈՒՄ

1991 թ. մարտի 20-ին, չորեքշաբթի օրը, երեկոյան, Մայր Աթոռ Ս. Էջմիածնի Վեհաքառնում տեղի ունեցավ Նորին Սուրբ Օծուխյուն Ս. Տ. Վազգեն Ա Ամենայն Հայոց Վեհափառ Հայրապետի հանդիպումը հայրենի մտավորականության ներկայացուցիչների հետ:

Հանդիպմանը ներկա էին հյուրաբար Մայր Աթոռում գտնվող Երուսաղեմի հայոց Պատրիարք Ամենապատիվ Ս. Թորգոմ արքեպիսկոպոս Մանուկյանը, ԱՄՆ-ի հայոց արևմտյան թեմի առաջնորդ Ս. Վաչե արքեպիսկոպոս Հովսեփյանը, Ս. Ծախե արքեպիսկոպոս Աճեմյանը, ԱՄՆ-ի հայոց արևելյան թեմի առաջնորդ Ս. Խաժակ եպիսկոպոս Պարսամյանը, Կանադայի հայոց թեմի առաջնորդ Ս. Հովնաթ եպիսկոպոս Տերտերյանը, Մարսելի հայոց հոգևոր հովիվ Ս. Գարեգին ծայրագույն վարդապետ Պեք-նյանը, Ժնևի հայոց հոգևոր հովիվ Ս. Վիգեն ծայրագույն վարդապետ Այ-քազյանը, ինչպես նաև ներքին թեմերի թեմակալ առաջնորդներն ու Սուրբ Էջմիածնի Մայրավանքի միաբանության անդամները:

Հանդիպմանը հրավիրված էին Հայաստանի Հանրապետության Նախարարաց խորհրդին առընթեր Հայ Եկեղեցու գործերի խորհրդի նախագահ տիար Լյուդվիգ Խաչատրյանը, Գերագույն Հոգևոր Խորհրդի անդամները և հայրենի մտավորականության շուրջ 60 ներկայացուցիչներ, գրողներ, արվեստագետներ, մշակույթի, գիտության տարբեր բնագավառների անվանի գործիչներ, ինչպես նաև Հայաստանի Հանրապետության խորհրդարանի մի շարք անդամներ:

Հավաքույթի ատենավարն էր Մայր Աթոռի դիվանապետ Ս. Ներսես արքեպիսկոպոս Պողոսյանը:

Ողջույնի հակիրճ խոսքով հավաքույթը բաց արեց Ամենապատիվ Ս. Թորգոմ արքեպիսկոպոս Մանուկյանը:

Այնուհետև հանգամանալից զեկուցումով հանդես եկավ Ամենայն Հայոց Հայրապետը՝ կանգ առնելով հետևյալ երեք հարցերի վրա.

ա. Քրիստոնեական կրոնի այժմեականությունը հայ ժողովրդի կյանքում.

բ. Հայ Եկեղեցին և հայ ազատագրական շարժումը:

գ. Հայ Եկեղեցու կրոնական, բարոյական, կրթական ու հայրենասիրական առաքելությունը մեր օրերին:

Ապա, հանուն Հայաստանի Հանրապետության պետական իշխանության, օրվա հանդիսությունը ողջունեց Հայ Եկեղեցու գործերի խորհրդի նախագահ տիար Լյուդվիգ Խաչատրյանը:

Հանդիպման ընթացքում խոսք առան հայրենի մտավորականության 17 ներկայացուցիչներ, որոնք իրենց ելույթներում շոշափեցին այժմեական որոշ հարցեր, ինչպես Հայ Եկեղեցու և կրոնական դաստիարակության դերը այսօր հայրենաբնակ մեր ժողովրդի կյանքում, կրոնական-բարոյական բնույթի գրքերի, թերթերի հրատարակում, հոգևոր թեմաներով հաղորդումների հաճախակի կազմակերպում ուղիով և հեռուստատեսությամբ, սերտ համագործակցություն հանրապետության գիտական և մշակութային հաստատությունների և Մայր Աթոռի միջև և այլն: Այս կապակցությամբ եղան գործնական մի շարք առաջարկություններ:

Խորհրդակցական սույն հանդիպումը ավարտվեց Նորին Սրբության եզրափակիչ խոսքով, նրա օրհնությամբ և խմբովին արտասանված «Հայր մեր»-ով:

ԴԻՎԱՆ ՄԱՅՐ ԱԹՈՌԻ

Ս. Էջմիածին,

26 մարտի 1991 թ.

